



# basic education

Department:  
Basic Education  
REPUBLIC OF SOUTH AFRICA

## NATIONAL SENIOR CERTIFICATE

KEREITE YA 12

SESOTHO PUO YA TLATSETSO YA PELE (FAL)

PAMPIRI YA 2 (P2)

HLAKOLA/TLHAKUBELE 2014

MATSHWAO: 70

NAKO: dihora tse 2

Pampiri ena e na le maqephe a 19.

**DITAELO HO MOHLAHLUWA**

1. Bala dintlha tse hlahellang leqepheng lena ka tlhoko PELE o araba dipotso.
2. O se ke wa latella ho bala pampiri yohle. Tadima pele karolo e hlahisang dikahare tsa pampiri leqepheng le latelang, mme o tshwaye dinomoro tsa dipotso tse theilweng dibukeng tseo o ithutileng tsona selemong sena. Ka mora moo o bale dipotso tseo, o nto kgetha tseo o lakatsang ho di araba.
3. Pampiri ena e arotswe DIKAROLO tse NNE, e leng:

KAROLO YA A:	Padi/Nobele	(35)
KAROLO YA B:	Tshwantshiso/Terama	(35)
KAROLO YA C:	Palekgutshwe	(35)
KAROLO YA D:	Dithothokiso	(35)
4. O lokela ho araba dipotso tse PEDI feela tseo matshwao a tsona a etsang mashome a supileng (70) ha a kopanngwa. Araba potso e le NNGWE mofuteng wa sengolwa ho e MMEDI eo o ithutileng yona.
5. Badisisa ditaelo TSOHLE tse hlahiswang qalehong ya karolo e NNGWE le e NNGWE ka tlhoko.
6. Nomora dikarabo tsa hao jwalo ka ha dipotso di nomorilwe pampiring ya dipotso.
7. Qala karolo e NNGWE le e NNGWE leqepheng LE LETJHA, mme o sehe mola qetellong ya karolo ka nngwe.
8. Ngola ka mongolo o makgethe o balehang.
9. Mohlahlobuwa o eletswa ho sebedisa nako kamoo ho sisintsweng: O lokela ho ngola karolo e nngwe le e nngwe bonyane metsotso e 60.

**LEQEPHE LA DIKAHARE:**

Dintlha tse hlahisitsweng leqepheng lena di tla thusa mohlalobuwa ho kgetha dipotso tseo a lakatsang ho di araba ntle le ho qobelleha hore a bale pampiri kaofela.

<b>KAROLO YA A: PADI/NOBELE</b>			
<b><i>Araba potso EFE kapa EFE E LE NNGWE.</i></b>			
<b>NOMORO YA POTSO</b>	<b>MOFUTA WA POTSO</b>	<b>MATSHWAO</b>	<b>NOMORO YA LEQEPHE</b>
1. <i>Mahlale a kopane Lekwa</i>	Mofuta wa potso e telele ya moqoqo	35	5
<b>KAPA</b>			
2. <i>Mahlale a kopane Lekwa</i>	Mofuta wa dipotso tse kgutshwane	35	5
<b>KAPA</b>			
3. <i>Bosweu ba Lehlwa</i>	Mofuta wa potso e telele ya moqoqo	35	7
<b>KAPA</b>			
4. <i>Bosweu ba Lehlwa</i>	Mofuta wa dipotso tse kgutshwane	35	7
<b>KAPA</b>			
5. <i>Sehlekehleke sa Deidro</i>	Mofuta wa potso e telele ya moqoqo	35	8
<b>KAPA</b>			
6. <i>Sehlekehleke sa Deidro</i>	Mofuta wa dipotso tse kgutshwane	35	8
<b>KAROLO YA B: TSHWANTSHISO/TERAMA</b>			
<b><i>Araba potso EFE kapa EFE E LE NNGWE.</i></b>			
7. <i>Sefi</i>	Mofuta wa potso e telele ya moqoqo	35	11
<b>KAPA</b>			
8. <i>Sefi</i>	Mofuta wa dipotso tse kgutshwane	35	11
<b>KAROLO YA C: PALEKGUTSHWE</b>			
<b><i>Araba potso EFE kapa EFE E LE NNGWE.</i></b>			
9. <i>Modia</i>	Mofuta wa potso e telele ya moqoqo	35	13
<b>KAPA</b>			
10. <i>Modia</i>	Mofuta wa dipotso tse kgutshwane	35	13
<b>KAROLO YA D: DITHOTHOKISO</b>			
<b><i>Araba dipotso tse DING LE TSE DING TSE PEDI.</i></b>			
11. <i>Kgaeyane</i>	Mofuta wa dipotso tse kgutshwane	17½	15
<b>KAPA</b>			
12. <i>Ngwana lehlaswa</i>	Mofuta wa dipotso tse kgutshwane	17½	16
<b>KAPA</b>			
13. <i>Fatsheng lena</i>	Mofuta wa dipotso tse kgutshwane	17½	17
<b>KAPA</b>			
14. <i>Mmadiberwane</i>	Mofuta wa dipotso tse kgutshwane	17½	18



**LENANENNETEFATSO:**

Sebedisa lenanennetefatso lena ho nnetefatsa hore na e fela o arabile dipotso tse hlokehang.

<b>KAROLO YA</b>	<b>NOMORO TSA DIPOTSO</b>	<b>PALO YA DIPOTSO TSE LOKELANG HO ARAJWA</b>	<b>TSHWAYA (√)</b>
A: PADI/NOBELE (Potso e telele (moqoqo) KAPA dipotso tse kgutshwane)	1–6	1	
<b>KAPA</b>			
B: TSHWANTSHISO/TERAMA (Potso e telele (moqoqo) KAPA dipotso tse kgutshwane)	7–8	1	
<b>KAPA</b>			
C: PALEKGUTSHWE (Potso e telele (moqoqo) KAPA dipotso tse kgutshwane)	9–10	1	
<b>KAPA</b>			
D: DITHOTHOKISO Dipotso tse kgutshwane	11–14	2	
<b>PALO YOHLE YA DIPOTSO TSE LOKELANG HO ARAJWA</b>		2	

**ELA HLOKO:** O tshwanetse hore o be o arabile dipotso tse PEDI tse tswang dibukeng tse pedi tse fapaneng tseo o ithutileng tsona selemong sena.



**KAROLO YA A: PADI/NOBELE**

Araba potso ya buka eo o ithutileng yona feela karolong ena.

Ho botsitswe dipotso tse TSHELETSENG karolong ena. Kgetha mme o arabe potso e le NNGWE e itshetlehileng bukeng e le NNGWE eo o ithutileng yona selemong sena.

**POTSO YA 1: MAHLALE A KOPANE LEKWA – DN Katsie**

Ka bolelele ba mantswe a 250 ho isa ho a 300, hlalosa kamoo nako/mehla ya diketsahalo le tikoloho di hlalisitsweng kateng sengolweng sena.

**[35]****KAPA****POTSO YA 2: MAHLALE A KOPANE LEKWA – DN Katsie**

Bala qotso ena ka tlhoko o nto araba dipotso tse tla e latela tse thehilweng paleng yohle.

A mula pere ho leba hae. A e fatisa makwatsi, ha thunya lerole.  
Ha a fihla hae a dula a touta! 'Banna na moloi eo o ntshetseshetse morao ka dife? Ke re na o nkutlwa eng ... na ke sa tla ja ditheohelang ka kaako lee la ho tsoha le shwele banna?'  
A ipotsa dipotso, karabo a e hloka, a hloka le yena motshedisi. A ntsha seboko, a lla hi-hii jwalo ka lesea.  
E ne e se e le hona ho itshedisa mahlomoleng ana a mo apereng jwalo ka botsikwane kgohong.  
Letlotlo le mo phonyohile hape. Ke mofutsana wa maoba le maobeng. 'Jo wee, jo nna wee ... (o a bokolla). Na ekaba tsietsi ya tjehelele ena ya diabolosi e sa tla fela ... ke re e tla fella kae bo ...!'

- 2.1 Hantlentle motho eo ya mulang pere seratswaneng se ka hodimo ke mang? (1)
- 2.2 Hona ha a tla fihla hae a touta, monna eo o mmoletseng ho 2.1, o ne a tswa kae? (1)
- 2.3 Mophetwa ya ntseng a bua moo, o dula motseng ofe? (1)
- 2.4 O ne a ile kae ha letlotlo le tla mo phonyoha? (1)
- 2.5 Le ne le se le mo phonyoha kgetlo la bokae letlotlo lee? (1)
- 2.6 Hlalosa ka ntlha tse THARO, kamoo letlotlo leo ho buuwang ka lona mona le ileng la mo phonyoha kateng kgetlong lena. (3)
- 2.7 Ke ofe ya bohlae ho feta e mong pakeng tsa Mananyetsa le Sekgukguni ho ya ka diketsahalo tsa pale? (2)



Boela o bale qotso e latelang ka tlhoko o nto araba dipotso tse tla e latela.

'Le kgale, nke ke ka mo tlohela. Mohlomong ha e so ho be hole. Ho ka nna ha etsahala hore ke mo fumane. Ke tla fihla ke re thipa yane ya ka hlwi ...! Ke tla mo jabela haholo feela pakeng tsa mahlo mona, o ithuta batho ka nna hee! Ke tla mo ntshetsa nna, ke a bona ha a nnepe hantle ... o tsamaya a nkutlwa mothamahaneng.'

Ho bile jwalo he, mmadi. Moforeistata o eellwa hore o qhekanyeditswe, mme o tla a kgile ka saole ka mona. Athe Moteransefala le yena o iphumana a phelekanyeditswe hampe, mme o tla a kubeleditse marole ka mona.

- 2.8 Ka ntlha tse PEDI, akaretsa se ileng sa etsahala ha mophetwa ya tshwereng thipa a fihla. (2)
- 2.9 Maemo a bophelo a Sekgukguni ha a ne a le leetong le yang Foreisetata a fapana jwang le maemo a hae a bophelo ha a se a kgutlela hae Teransefala? (2)
- 2.10 Ke Nnete kapa Mafosi hore mophetwa ya buang qotsong ya bobedi, o ile a boela a le fumana letlotlo leo? Tiisa karabo ya hao ka lebaka. (2)
- 2.11 Mongodi o sebedisitse mokgwa/tsela efe ho re senonela semelo sa Mananyetsa le Sekgukguni? Kgetha karabo e nepahetseng ho tse latelang: Tiisa ka lebaka. (2)
- A Mongodi ka boyena o hlalosa semelo sa bona.  
B Dipuo le diketso tsa bona, di senola semelo sa bona.  
C Mongodi o sebedisa moaparo ho senola semelo sa bona.  
D Baphetwa ka bobona ba a itlhalosa. (2)
- 2.12 Hlalosa kamoo maemo a tsa phedisano, a susumeditseng Moforeisetata le Moteransefala hore ba phele ka tsela eo ba neng ba phela ka yona. (2)
- 2.13 Ketsahalo ya hore Moteransefala a dule nako e telele hakaalo ka motjhesong wa lebitla, e mo senola e le motho wa semelo sefe? (2)
- 2.14 Kgohlano e hlahellang paleng ena ke ya kantle. Nehelana ka lebaka le tiisang polelo ena. (2)
- 2.15 Maele ana, 'sebonwang se bonwa ke bohle', a dumellana le ketsahalo efe paleng ena? (2)
- 2.16 Mananyetsa o meharo. Nnetefatsa kapa o hanane le taba ena. (2)
- 2.17 Na ketsahalo ya hore mofumahadi wa morena le matona a hae ba kgolwe hore motho ya neng a bua ka lebitleng e ne e le morena Ramoroko, e a kgolweha? Hlalosa. (2)
- 2.18 Tsela eo mongodi a phethelang pale ena ka yona, e fana ka maikutlo afe ho babadi mabapi le bonokwane bo entsweng ke baphetwa bana? (2)
- 2.19 Maemo a bophelo lapeng la Sekgukguni a etsa hore o ikutlwe jwang malebana le mohatsae? Fana ka lebaka la karabo ya hao. (3)

[35]

### KAPA



**POTSO YA 3: BOSWEU BA LEHLWA – Sello Moroe**

Ka bolelele ba mantswe a 250 ho isa ho a 300, hlalosa kamoo nako/mehla ya diketsahalo le tikoloho di hlalohang kateng sengolweng sena.

**[35]****KAPA****POTSO YA 4: BOSWEU BA LEHLWA – Sello Moroe**

Bala qotso ena ka tlhoko o nto araba dipotso tse tla e latela tse thehilweng paleng yohle.

Sontaheng se seng ke ne ke iphomoletse kamoreng, ke ipaqametse betheng, ke itetsetsa mmimo o phodileng, ha ke hopola tshwantsho sane sa Lerato, mme ka ya sutukeising eo ke neng ke se beha ho yona. Eitse ha ke e bula ka bona mangolo a mararo.

- 4.1 Mantswe a qotsong e ka hodimo ke a mophetwa ofe? (1)
- 4.2 Mangolo ao a mararo a ne a tswa ho mang? (1)
- 4.3 Ntle ho setshwantsho le mangolo, ke ntho efe e nngwe e neng e le teng ka moo ka sutukeising? (1)
- 4.4 Ntho eo o e boletseng ho 4.3, e ne e le mpho e tswang ho mang? (1)
- 4.5 Mophetwa eo o mmoletseng ho 4.1, o ne a latetse lekala lefe la dithuto yunibesithing? (1)
- 4.6 Bolela melemo e MMEDI eo thuto e ileng ya ba le yona bophelong ba mophetwa eo o mmoletseng ho 4.1. (2)
- 4.7 Ke dintho dife tse PEDI tseo mme wa Lerato le mme wa Dineo ba neng ba tshwana ka tsona mabapi le mophetwa eo o mmoletseng ho 4.1? (2)
- 4.8 Lefu la Lerato le ile la ba le ditholwana dife tse bosula ho mophetwa eo o mmoletseng ho 4.1? (1)
- 4.9 Akaretsa ka dintlha tse THARO se ileng sa etsahala mohla mophetwa eo o mmoletseng ho 4.1, a neng a kgutlisetsa lengolo ho monga lona. (3)
- 4.10 Ketsahalo eo ho buuwang ka yona ho 4.9, e etsahetse ka mora dilemo tse kae Lerato a hlokahetse? (1)
- 4.11 Kgetha karabo e nepahetseng ho tse latelang.  
Kgothano e hlahellang paleng ena ke ya ka ntle hobane ... (2)
- A ke twantshano e ka hara mophetwa.  
B ke twantshano e pakeng tsa batho ba amanang ka tswalano.  
C ke twantshano e pakeng tsa baphetwa.  
D ke twantshano e pakeng tsa batswadi.



- 4.12 Bolela hore polelo e latelang ke Nnete kapa Mafosi, o be o nehelane ka lebaka la karabo ya hao.  
Mohla Hlomi a neng a utlwa hore Lerato o imme, o ile a thaba haholo. (2)
- 4.13 Sepheo sa mongodi ke sefe ka ho hlahisa Lerato a qetella a dumela Hlomi ka mora hore a mo hane ka nako e telele? (2)
- 4.14 Ketso ya Lerato ya ho buella Hlomi mohla a neng a lwana le Tshiu, e mo senola e le motho wa semelo sefe? (2)
- 4.15 Na toro eo Hlomi a ileng a e lora ka Lerato e ne e bua nnete? Nehelana ka lebaka la karabo ya hao. (2)
- 4.16 Nehelana ka ketsahalo e le NNGWE tshwantshisong ena, e tiisang hore ditaba tsa yona ke tsa mehleng ya kajeno. (2)
- 4.17 Maele a reng, 'mamello e tswala katleho', a dumellana le ketsahalo efe paleng ee? (2)
- 4.18 Na taba ya hore Botjha a ipherehele Hlomi, ke ntho e kgolwehang? Nehelana ka lebaka la karabo ya hao. (2)
- 4.19 Na o dumellana le taba ya hore Firi a sebedise ditlhare ho hapa pelo ya Lerato? Nehelana ka lebaka la karabo ya hao. (2)
- 4.20 Ho ima ha Lerato a eso ka a qeta dithuto tsa hae, ho etsa hore o be le maikutlo a mofuta ofe? Tiisa karabo ya hao ka lebaka. (3)  
[35]

**KAPA****POTSO YA 5: SEHLEKEHLEKE SA DEIDRO – VT Masima**

Ka bolelele ba mantswe a 250 ho isa ho a 300, hlalosa kamoo nako/mehla ya diketsahalo le tikoloho di hlahisitsweng kateng sengolweng sena. [35]

**KAPA****POTSO YA 6: SEHLEKEHLEKE SA DEIDRO – VT Masima**

Bala qotso ena ka tlhoko o nto araba dipotso tse tla e latela tse thehilweng paleng yohle.

'Be! Athe nako e se e ile hakaale? Jwale, le wena Chikano o se o ntlohetse feela hore ke nne ke bebere ho ya ho ile. Ana o ne o rata ha nka o thusa ka eng?'

'Hantlentle ke ntse ke tsomana le moruti e mong wa Ilizwi Mission Church eo ho thweng o na le kereke kwana Bosothonia, eo e itseng ha ke leka ho mo tshwara ka fono maobane, ka bolellwa hore o tlile kwano mona ho tla hlwela kereke e nngwe e tlasa tsamaiso ya hae.'





- 6.1 Chikano o ntse a buisana le mang moo? (1)
- 6.2 Puisano ena e etsahalla naheng efe? (1)
- 6.3 Moetapele ya neng a kwetetswe nakong ya puisano ena ya bona ke mang? (1)
- 6.4 Bolela hore moetapele eo o mmoletseng ho 6.3, o ile a kwetelwa a le hokae mme a kwetelwa ka taelo ya mang? (2)
- 6.5 Ha boChikano ba ntse ba buisana mona, moruti eo a mmatlang o ne a le motseng ofe? (1)
- 6.6 Hantlentele ke taba efe eo Chikano a neng a e batlela moruti eo a buang ka yena? (1)
- 6.7 Ke ketsahalo efe e ileng ya hlahela Chikano ka ho tshwana, ha a tla baleha Oshakati le mohla a neng a pholoswa ke Paliya Kaluyanda naheng eo o e boletseng ho 6.2? (2)
- 6.8 Bolela dintho tse PEDI tseo mobishopo Biala, a tshwanang ka tsona le moruti enwa ya batlwang ke Chikano. (2)
- 6.9 Akaretsa ka dintlha tse THARO kamoo ketelo ya Chikano, e bileng bosula kateng naheng eo o e boletseng ho 6.2. (3)

Boela o bale qotso e latelang ka tlhoko o nto araba dipotso tse tla e latela tse thehilweng paleng yohle.

'Ke bona eka o na le thahasello e kgolo setshwantshong seo o se shebileng, monghadi Chikano. Hona ho nketsa hore ke be motlotlo ho o bolella hore nna le phiri re ntho e le nngwe, mme bohle ba tlasa tsamaiso ya ka ke bona ba bitswang Bana ba Phiri.'

Lekgatheng lena Chikano a ikutlwa hantle hore o feletswe ke matla, mme a batla ho dula fatshe kapele, mme ka ho qamaqamaka ha hae ka sepheo sa ho batla moo a ka dulang, mahlo a hae a re ptjangptjang le a mobishopo Biala, a ba a tjetjha ka santhao a sa labella.

'Dumela, mora Chikano. O amohlehile sehlekehlekeng sa Tumelo.' Lebonyo la Biala e ne e le la letona, moeka ho bonahala hore o thabile e le ka nnete.

- 6.10 Hobaneng Chikano a ne a na le thahasello setshwantshong seo a neng a se shebile? (2)
- 6.11 O nahana hore ke ntho efe e neng e etsa hore mobishopo Biala a thabele ho kopana le Chikano? (2)
- 6.12 Ke mophetwa ofe ho ba latelang, eo o ka reng ke mophetwa ya tjetjha/phethahetseng? Fana ka lebaka. (2)
- A Chikano.
- B Ramaqiti.
- C Mobishopo Biala.
- D Paliya Kaluyanda.



- 6.13 Bolela hore ke Nnete kapa Mafosi, o be o tiise karabo ya hao ka lebaka.
- 6.13.1 Kgohlano e hlahellang paleng ena ke ya ka hare. (2)
- 6.13.2 Maele a reng bitsolebe ke seromo, a dumellana le lebitso la Ramaqiti. (2)
- 6.14 Puisano ena ya Chikano le Ramaqiti, e senola Ramaqiti e le mophetwa ya bohlale kapa ya sethoto? Nehelana ka lebaka la karabo ya hao? (2)
- 6.15 Tharollo e bile efe qakeng eo mophetwa wa sehlooho a neng a thulane le yona paleng ee? (2)
- 6.16 Mantswe a Ramaqiti a latelang, ke ntlha kapa ke mohopolo? Nehelana ka lebaka la karabo ya hao.
- 'Ah-ntho ena monghadi Chikano ke mesebetsi ya boko bo hlwahlwa ba banna le basadi bao bohlale le boiphihlelo ba bona bo fetang eng kapa eng e kileng ya tsejwa ke motho.' (2)
- 6.17 Na o ka re ketsahalo ya ho kwetelwa ha mopresidente Ispia Monnafeela e dumellana le mehla/nako ya diketsahalo paleng ee? Nehelana ka lebaka la karabo ya hao. (2)
- 6.18 Polao e sehloho ya moemedi wa Botswana kopanong ya baruti e neng e tshwerwe ke mobishopo Biala e etsa hore o ikutlwe jwang ka monna eo? Nehelana ka lebaka la karabo ya hao. (3)

**[35]****MATSHWAO OHLE A KAROLO YA A: 35**

**KAROLO YA B: TSHWANTSHISO/TERAMA**

Araba potso ya buka eo o ithutileng yona feela karolong ena.

Ho botsitswe dipotso tse pedi karolong ena. Kgetha mme o arabe potso e le NNGWE e itshetlehileng bukeng e le NNGWE eo o ithutileng yona selemong sena. Araba POTSO ya 7 kapa POTSO ya 8.

**POTSO YA 7: SEFI – DJ Nkutha**

Ka bolelele ba mantswa a 250 ho isa ho a 300, hlalosa seabo sa dibapadi tse latelang tshwantshisong ena:

- Moetapele/molwantshuwa
- Mohanyetsi/molwantshi
- Mohlohlelletsi/monamodi

**[35]****KAPA****POTSO YA 8: SEFI – DJ Nkutha**

Bala qotso e latelang o nto araba dipotso tse thehilweng tshwantshisong yohle.

MMATISETSO:	Le mo loile, le mo entse mophaphathehi, ha le qeta ha le tsebe ho mo phekola.
RABODITSE:	Mosadi, o tlohele ho ntena le ho nthohaka ... Taba ya pele, ha se wena ya mo tlisitseng ha ka mona, o itlisitse. Tsa boloi tsona o hle o le bale ka tsona. Monnanyana eo wa hao o jelwe ke 'kearata'.
MMATISETSO:	(A hlwedisa kamoreng.) E se ke yaba o mo fetotse sethotsela. Ha ke le tshepe, etswe ke hlokometse hore le tletse mohono le botjholotjholo.

- 8.1 Bolela lebitso la mophetwa eo ho thweng o louwe. (1)
- 8.2 Puisano ena ya Raboditse le Mmatisetso e etsahalla sebakeng sefe? (1)
- 8.3 Mmatisetso o amana jwang le sebakeng seo o se boletseng ka hodimo ho 8.1? (1)
- 8.4 Fana ka mabaka a MARARO a entseng hore Mmatisetso le moradiae, ba tswa letsholo la ho ya batla mophetwa eo o mmoletseng ho 8.1. (3)
- 8.5 Bolela lebaka le entseng hore Mmatisetso a ye ho batla monna wa hae ha Raboditse e seng nqa e nngwe. (1)
- 8.6 Nehelana ka ntlha e le NNGWE e bontshang ho se tshwane pakeng tsa lelapa la Raboditse le la Motaung. (2)
- 8.7 Akaretsa ka dintlha tse PEDI ditaba tsa bohlokwa puisanong ya Mmatshela le Motaung, mohla Motaung a neng a kgutla mosebetsing a lelekuwe. (2)



- 8.8 Diketso tsa Nkepe tsa ho se tsotelle sekolo di ile tsa mo tswalla ditholwana dife tse bosula? Bolela tse PEDI. (2)
- 8.9 Ke botle bofe bo le BONG bo ileng ba tliswa ke ketso ya hore Motaung a lelekwe mosebetsing mme a be a lelekwe le ke Mmatshela? (1)
- 8.10 Ketso ya Mmatshela ya ho ya batla monna wa hae ha Raboditse e mo senola e le motho wa semelo sefe? (2)
- 8.11 Bolela hore polelo e latelang ke Nnete kapa Mafosi, o be o fane ka lebaka.  
Diqoso tsa Mmatshela tsa hore Raboditse ke yena ya entseng hore Khathatso a se hlokomele lelapa la hae, ha se tsa nnete. (2)
- 8.12 Maikemisetso a mongodi terameng ee ke afe ka bophelo ba Motaung? (2)
- Boela o bale qotso e latelang o nto araba dipotso tse thehilweng tshwantshisong yohle.

**RABODITSE:** Tjhe, sekgo se ratlane ka yona tsela eo Mmankepe a neng a e batla. Ke yena ha se nna. O putlame fatshe Motaung. Dithoto ho ngodilwe ha thwe ke lefa la ba bohlae. O lahlile tsohle tsa hae kajeno, re a tshwana re se mawelana. O mo tshwere a mo kuta mosadi yane wa jwaleng. Ha ke le bale mohlang a neng a nteleka mosadi eo wa letekatse ha a bona nku ena. Nku ke ya Tselakgopo mme sekere ke sa Phahameng. (A thola motsotswana.) Bonnete le nna ke a itshola. Ke madi matsohong ka baka la mosadi, e leng Mmankepe. (A makala.) Ke utlwa diqi. Ekare ho na le motho ya tlang kwano. Ebe ke mang, ke itjella masapo a hlooho, ke buisana le ba fatshe?

- 8.13 Raboditse o bua a le mong qotsong ena. Sena se bitswa eng hona bohlokwa ba sona ke bofe? (2)
- 8.14 Nnetefatsa polelo ena o ipapisitse le qotso.  
Kgohlano e hlahellang qotsong ena ya bobedi ke ya ka hare. (2)
- 8.15 Maele a reng, 'nonyana tsa siba le leng di fofa mmoho', a dumellana le ketsahalo efe tshwantshisong ee? (2)
- 8.16 Nehelana ka ketsahalo e le NNGWE tshwantshisong ena, e tiisang hore ditaba tsa yona ke tsa mehleng ya kajeno. (2)
- 8.17 Ho ya ka wena, na Raboditse o a nepa ha a re ho ruta ngwana ngwanana ke ho senya? Nehelana ka lebaka la karabo ya hao. (2)
- 8.18 Na o tshehetsa mohopolo o reng mongodi o dumellana le tshebediso ya ditlhare tsa setso? Tshehetsa karabo ya hao ka lebaka. (2)
- 8.19 Ho itshola hona ha Raboditse qotsong ya bobedi, ho etsa hore o ikutlwe jwang? Nehelana ka lebaka la karabo ya hao. (3)

**[35]****MATSHWAO OHLE A KAROLO YA B: 35**

**KAROLO YA C: PALEKGUTSHWE**

Ho botsitswe dipotso tse pedi karolong ena. Kgetha mme o arabe potso e le NNGWE e itshetlehileng palekgutshweng e le NNGWE eo o ithutileng yona selemong sena. Araba POTSO ya 9 kapa POTSO ya 10.

**POTSO YA 9: MODIA – MK Mofihli le ba bang**

Ka bolelele ba mantswe a 250 ho isa ho a 300, hlalosa kamoo kgohlano e hlalisitsweng kateng palekgutshweng ena.

**[35]****KAPA****POTSO YA 10: MODIA – MK Mofihli le ba bang**

Bala qotso e latelang o nto araba dipotso tse thehilweng tshwantshisong yohle.

**NA HO NEPAHETSE?**

'Mojalefa, kereke ena ya Tjhatjhe le e sentse. Le fetotse tsamaiso ya yona. Matsatsing ana ka kerekeng e ka ka mmantlwaneng. Ka kerekeng le tlaela ka lebitso ...' Ka yona nako eo Mmaneo a mo kena hanong. 'Butle bo ntate, wena o bua dife jwale?' Monnamoholo a tadima fatshe motsotswana mme a nyolla hlooho a re, 'Kwana o utlwile hantle mosadi ka hore na ke bua dife. Ke tshepa hore le wena Mojalefa o ntse o utlwa hantle hore na ke reng. Ke re ka kerekeng le tlaela ka lebitso la Modimo ka hore wena le moruti wa hao le tlatse lerata ha le re le a rera.'

- 10.1 Ntate eo ho buuwang ka yena qotsong ke mang, hona o amana jwang le Mmaneo? (2)
- 10.2 Mmaneo le lelapa la hae ba ne ba dula motseng ofe? (1)
- 10.3 Bolela sepheo sa ketelo ya Mojalefa ha Mmaneo. (1)
- 10.4 Ntle le ho tlaela ka lebitso la Modimo, bolela ntho e nngwe eo motho eo o mmoletseng ho 10.1 a neng a re e mo fedisa pelo kerekeng. (1)
- 10.5 Hana mohla Mojalefa a neng a etetse ha Mmaneo, boemo ba lehodimo bo ne bo le jwang? Fana ka ntlha tse PEDI. (2)
- 10.6 Ho ya ka motho eo o mmoletseng ho 10.1, tsamaiso ya kereke ya mehleng ya pele e ne e fapane jwang le ya mehleng ya kajeno? (2)
- 10.7 Ho ya ka ditaba tsa palekgutshwe ee, tshwano ke efe pakeng tsa kereke le Bakeresete? (2)
- 10.8 Akaretsa ka ntlha tse THARO seo ho thweng bana ba tla se etsa ha ba sa rutwe melao. (3)



- 10.9 Bolela hore dipolelo tse latelang ke Nnete kapa Mafosi, o be o nehelane ka lebaka.
- 10.9.1 Ho ba teng ha Mobishopo ho ne ho etsa hore tshebeletso e be monate ka kerekeng. (2)
- 10.9.2 Ntate enwa ya ntseng a bua mona, o ne a utlwisisa Mojalefa. (2)
- 10.10 Qoholla ketsahalo e le NNGWE palekgutshweng ena, eo e leng mohlala wa kgethollo ya bong. (2)
- 10.11 'Motho yane ya tlang le mane ekaka Mojalefa,' ho realo monnamoholo. Monnamoholo o bua a le mong mona. See se bitswa eng hona bohlokwa ba sona ke bofe? (2)
- 10.12 Mophetwa wa sehlooho palekgutshweng ena ke mang? Fana ka lebaka. (2)
- 10.13 Nehelana ka ketsahalo e le NNGWE tshwantshisong ena, e tiisang hore ditaba tsa yona ke tsa mehleng ya kajeno. (2)
- 10.14 Palekgutshweng ena, kgohlano e pakeng tsa ditjhadimo dife tse PEDI? (2)
- 10.15 Mongodi o re ruta eng ka palekgutshwe ee? (2)
- 10.16 Na o ka re ditaba tsa palekgutshwe ee, di dumellana le sehlooho sa yona? Nehelana ka lebaka la karabo ya hao. (2)
- 10.17 Ketsahalo ya hore motho ya neng a tahlilwe, a pake mofu eo a neng a sa mo tsebe tebelong, e etsa hore o ikutlwe jwang? Nehelana ka lebaka la karabo ya hao. (3)

**[35]****MATSHWAO OHLE A KAROLO YA C:****35**

**KAROLO YA D: DITHOTHOKISO**

Araba dipotso tse PEDI ho tse NNE (POTSO YA 11, POTSO YA 12, POTSO YA 13 le POTSO YA 14) tse botsitsweng karolong ena.

**POTSO YA 11**

Bala thothokiso ena ka tlhoko, ebe o araba dipotso tse tla e latela.

**KGAEYANE – RN Phume**

- 1 Mmoneng ke eo moeka
- 2 Ke mmoneng o bonwa ke bohle,
- 3 Tlhong o na di amohuwe kgale;
- 4 A di amohwe kgale ke kolobe.
- 5 O na qale eka o a swaswa,
- 6 Athe hloko bo ntse bo mo nanyetsa
- 7 Bo mo nanyetsa a sa lemohe,
- 8 Hloko bo hlotse, bo padile.
- 9 Bohloko ha Kgaeyane,
- 10 Ha Kgaeyane ho jewa mamina;
- 11 Ho jewa mamina, Kgaeyane o kae?
- 12 O ha mme tshela-se-tlale.
- 13 Ka hanong ho tswang?
- 14 Ho tswa tlhakantsutsu, mofutswela;
- 15 O bina pina e hloka noto,
- 16 A ke ke a ba a e pheta.

- 11.1 Ke mang eo sethothokisi se reng a bonwe? (1)
- 11.2 Sethothokisi se re ka hanong la Kgaeyane ho tswa eng? (1)
- 11.3 Ho ya ka thothokiso, ke lebaka lefe le etsang hore Kgaeyane a hloke ditlhong? (1)
- 11.4 Ke mantswa afe a MABEDI a bolelang ntho e le nngwe temanathothokisong ya bobedi? (2)
- 11.5 Akaretsa ka dintlha tse PEDI se bolelwang ke temanathothokiso ya bone. (2)
- 11.6 Bonono ba bothothokisi bo sebedisitsweng melathothokisong ya 10 le 11 bo bitswa eng? (2)
- 11.7 Karaburetso e molathothokisong wa 14 ke ya mofuta ofe? Kgetha karabo e nepahetseng ho tse latelang: (1)
  - A Karaburetso ya pono.
  - B Karaburetso ya kutlo.
  - C Karaburetso ya tatso.
  - D Karaburetso ya ho kamo (ho thetswa).



- 11.8 Hlalosa se bolelwang molathothokisong wa 12. (2)
- 11.9 Thothokiso ee ke ya mofuta ofe? (1½)
- 11.10 Molaetsa wa thothokiso ena ke ofe? (2)
- 11.11 Molathothokisong wa 1 ho sebedisitswe enjambamente/molamotjetje ka sepheo sefe? (2)
- [17½]**

## POTSO YA 12

Bala thothokiso ena ka tlhoko, ebe o araba dipotso tse tla e latela.

### NGWANA LEHLASWA – KE Ntsane

- 1 Kgwedi ya bosupa e mo thwaseditse tseleng,  
2 E thwasitse a shapile naha ho sotleha,  
3 Tlhabela e ka re tsa terekere, mangope,  
4 Hempe sebopeho ha e tsejwe,  
5 Borikgwe dilapa ke malwanglwahla,  
6 Bono di setse ka ntle ngwana morui!
- 7 Kgwedi ya bosupa e fedile a thotswe mapolasing,  
8 A thotswe ke morui wa difariki diketekete,  
9 Mohlape wa dikolobe masimong botshabelo.  
10 O tebatebisa hoki ho pota sefate;  
11 Ngwana morui le papa ha a e thole,  
12 Ngwana morui kajeno o phakela dikolobe.
- 13 A dula thotaneng a lohotha taba,  
14 Taba boholo ke lapeng habo mofuthung,  
15 Lapeng habo a hopola ka pelotlhomohi,  
16 A hopola rato la mmae le ntatae,  
17 Meokgo ya seka kolobe tsa makala,  
18 Meokgo ya seka pelo ya utlwa bohloko.
- 19 Ho esa kolobe tsa hloka modisa,  
20 Modisa o ile kae a siya mohlape?  
21 Modisa o tshwere thota o hopotse kae?  
22 O hopotse lapeng habo, Kanana.  
23 'O tla reng ngwana ha o fihla?'  
24 'Ke tla re, ntshwarele ke fositse?'

- 12.1 Kgwedi ya bosupa e thwasetsa ngwana lehlaswa a le hokae? (1)
- 12.2 Hobaneng ngwana lehlaswa a ile a siya dikolobe di le ding? (1)
- 12.3 Ngwana lehlaswa o ne a sebetsa hokae? (1)





- 12.4 Bolela motho a le MONG eo ngwana lehlaswa a neng a mo hopola. (1)
- 12.5 Ke sefe seo ngwana lehlaswa a neng a ikemiseditse ho se bua ha a fihla habo? (1)
- 12.6 Akaretsa ka dintlha tse PEDI se bolelwang ke temanathothokiso ya pele. (2)
- 12.7 Bonono ba bothothokisi bo sebedisitsweng molathothokisong wa 17 bo bitswa eng? Fana ka lebaka la tshebediso eo. (2)
- 12.8 Phetapheto e sebedisitsweng melathothokisong ya 19 le 20 ke ya mofuta ofe? Kgetha karabo e nepahetseng ho tse latelang:
- A Phetapheto ya moelelo.  
B Phetapheto ya sebopeho.  
C Epanalepsese.  
D Neheletsano/e tshekalletseng/lehokela/hlaahlela. (1)
- 12.9 Hlalosa se bolelwang ke sethothokisi molathothokisong wa 12. (2)
- 12.10 Thothokiso ee ke ya mofuta ofe? (1½)
- 12.11 Molaetsa wa thothokiso ena ke ofe? (2)
- 12.12 Lebotsi le molathothokisong wa 21, le sebedisitswe ka sepheo sefe? (2)  
[17½]

**KAPA****POTSO YA 13**

Bala thothokiso ena ka tlhoko, ebe o araba dipotso tse tla e latela.

**FATSHENG LENA – PM Ramathe**

- 1 Fatsheng lena la Mmopi,  
2 Ka mehla ketso tsa lona di nyarosa mmele,  
3 Di fahla mahlo a Mmopi sebele,  
4 Di totisa kgalefo ya monga rona Mmopi.
- 5 Fatsheng lena la Ntate kgotso ha e yo,  
6 Hoja ke le serurubele kokonyana e mapheo,  
7 Ke tle ke rurele hole dipaleseng,  
8 Hore ke se bone dipha mehoulda mathuleng.
- 9 Lena lefatshe le hloka kgauhelo dikoweng tsa rona,  
10 Hoja ke le leruarua tlhapi ya metsi a maholo,  
11 Ke ne ke tla sesetsa tebetebeng ya kweetsa,  
12 Hore ke se utlwe selo sa motho tsatsing la bofelo ...

- 13.1 Bolela ntho eo sethothokisi se reng e a se tshosa. (1)



- 13.2 Ke dintho dife tse PEDI tseo sethohokisi se lakatsang ho tshwana le tsona? (2)
- 13.3 Ho ya ka temanathohokiso ya boraro, ke eng eo sethohokisi se reng ha se lakatse ho e utlwa ka letsatsi la qetelo? (1)
- 13.4 Sethohokisi se re ke ntho efe e siyo lefatsheng? (1)
- 13.5 Akaretsa ka dintlha tse PEDI temanathohokiso ya pele. (2)
- 13.6 Bonono ba bothohokisi bo sebedisitsweng molathohokisong wa 9 ke ...  
Kgetha karabo e nepahetseng ho tse latelang.
- A Tshwantshanyo/papiso.  
B Tshwantshiso/serehello.  
C Lepata.  
D Mothofatso. (1)
- 13.7 Bohlokwa ba Anastrofi e sebedisitsweng molathohokisong wa 9, ke bofe? (2)
- 13.8 Karaburetso e fumanwang temanathohokisong ya 2, ke ya mofuta ofe? (2)
- 13.9 Thothokiso ee ke ya mofuta ofe? (1½)
- 13.10 Molaetsa wa thothokiso ee ke ofe? (2)
- 13.11 Kgonyetso e sebedisitsweng melathohokisong ya 1 le 5, e sebedisitse ka sepheo sefe? (2)
- [17½]

## POTSO YA 14

Bala thothokiso ena ka tlhoko, ebe o araba dipotso tse tla e latela.

### MMADIBERWANE – T Leballo

- 1 Banna ba ne ba jeswa phehla mokobolo,
- 2 Ba jeswa fiatana motsheare wa lengeta,
- 3 Ba e foqwa ho thwe ha e bolaye e a thapisa,
- 4 Mosadi a ba phatsitse ka hare le bohale.
- 5 Mosadi a ba sebeditse ka bheka mina ndedwa,
- 6 Banna ba siya malapa ba hlala basadi.
- 7 Tumo sa hae se ne se phatlaletse hohle,
- 8 Ya hae mekgwa e ne e tsejwa ke bohle,
- 9 E tsejwa Makgwakgweng ho ya Metjhatjhane,
- 10 Hore enwa mosadi ke mantja di a loma,
- 11 Enwa mosadi o bohale sa ntja ya motswetse,
- 12 Lena lebelete le sebete sa ho beha tau setswetse.



- 13 A kgobohelwa Ratjotjose wa Makgwakgweng,  
 14 A bua le maikutlo a qeta le pelo,  
 15 Hore enwa mosadi o tla be a thape,  
 16 Enwa ngwanana o tla mo ruta pula,  
 17 A mo phetshele jwalo sa nta ya lekoko.
- 18 A phutha mehaswana a wela tseleng,  
 19 Ka hara Thabadimahlwa a re balakatha!  
 20 Ha Mmadiberwane a fihla a kokota,  
 21 A kgahlanyetswa ke meno masowana bolotsana,  
 22 A tshellwa sekala mmitsa ho tlosa lelese,  
 23 A bontshwa diphate leraba hore a phomole.

- 14.1 Bolela sebaka se le SENG seo diketso tsa Mmadiberwane di neng di tsejwa ho sona. (1)
- 14.2 Bolela lebaka le neng le etsa hore banna ba hlale basadi. (1)
- 14.3 Mmadiberwane o ne a thapiswe ke mang? (1)
- 14.4 Bolela dintho tse PEDI tseo Mmadiberwane a ileng a tjeheha motho eo o mmoletseng ho 14.3 ka tsona hore a mo tshware. (2)
- 14.5 Akaretsa ka dintlha tse PEDI temanathothokiso ya bobedi. (2)
- 14.6 Bonono ba bothothokisi bo sebedisitsweng molathothokisong wa 7 ke ... Kgetha karabo e nepahetseng ho tse latelang:
- A Enjambamente/Molamotjetje.  
 B Kgonyetso.  
 C Lehokela.  
 B Sejura. (1)
- 14.7 Bohlokwa ba neheletsano/phetapheto e tshekalletseng e sebedisitsweng melathothokisong ya 10 le 11, ke bofe? (2)
- 14.8 Karaburetso e fumanwang temanathothokisong ya 4, ke ya mofuta ofe? (2)
- 14.9 Thothokiso ee ke ya mofuta ofe? (1½)
- 14.10 Molaetsa wa thothokiso ena ke ofe? (2)
- 14.11 Bohlokwa ba anastrofi e sebedisitsweng molathothokisong wa 11 ke bofe? (2)

[17½]

**MATSHWAO OHLE A KAROLO YA D: 35**  
**MATSHWAO OHLE A PAMPIRI ENA: 70**